

## Morning Dogri (NSD) National News Bulletin 28-03-2024

### आकाशवाणी

1. लोकसभा चुनावें दे दुए गेड़ लेई अधिसूचना अज्ज जारी करी दित्ती गई ऐ।
2. फौजी कमांडरें दा सम्मेलन अज्जै थमां नमीं दिल्ली च शुरू होआ करदा ऐ।
3. दिल्ली हाई कोर्ट नै दिल्ली दे मुखमंत्रि अरविंद केजरीवाल होरें गी राहत देने शा इंकार करी दित्ता ऐ। अदालतै प्रवर्तन निदेशालय गी आक्खेआ ऐ जे ओह 2 अप्रैल तोड़ी केजरीवाल हुंदी गिरफ्तारी पर अपना परता देऐ।
4. यूक्रेन दे विदेश मंत्री दिमित्रो कोलेबा अज्ज सरकारी यात्रा पर भारत आवै करदे न।
5. मेयामी आपेन टेनिस च शीर्ष वरीयता आले भारतीय खडारी रोहन बोपन्ना ते उंदे आस्ट्रेलिया दे जोड़ीदार मैथ्यू एबडन हुंदे स्पेन दे मारकल ग्रैनोलरस ते अर्जेटीना दे होरासियो जैबलोस मर्दे दे डबल्स सैमीफाइनल च अज्ज मकाबला होग।
6. आईपीएल च सनराइजर्स हैदराबाद नै मुंबइ इंडियनस गी 31 रंजें कन्नै हराया ते राजस्थान रॉयल दा मकाबला दिल्ली कैपिटल्स कन्नै अज्ज संजा साढ़े ज बजे जयपुर च होग।

<><><><><><>

### 2<sup>nd</sup> Phase

औंदे लोकसभा चुनावें दे दुए गेड़ लेई अधिसूचना अज्ज जारी होई गई। 12 राज्यें ते केन्द्र शासत प्रदेशों ते कन्नै गै बाकी बचे दे मणिपुर बाहरले लोकसभा हल्के च 88 लोक सभा सीटें च चुनावें होंगन। बाहरले मणिपुर हल्के दे इक हिस्से च चुनावें पैहले गेड़ तैहत होंगन। पैहले गेड़ तैहत केरल दियां 20 सीटें, कर्नाटक दिएं 14 सीटें पर, राजस्थान दिएं 13 सीटें पर, उत्तर प्रदेश ते महाराष्ट्र दियां 8-8 सीटें पर मध्यप्रदेश दिएं 7 सीटें पर, असम ते बिहार दिएं 5-5 सीटें पर, पच्छिम बंगाल ते छत्तीसगढ़ दिएं 3-3 सीटें पर ते मणिपुर, त्रिपुरा ते जम्मू कश्मीर दिएं 1-1 सीटें पर चुनावें होग। नामांकन पत्र 4 अप्रैल तोड़ी भरे जाई सकदे न। पैहले गेड़ लेई मतदान 26 अप्रैल गी होग। सब्बै राज्यें ते केन्द्र शासत प्रदेशों च नामांकन

पत्रें दी जांच 5 अप्रैल गी जम्मू कश्मीर गी छोड़ियै होग ते जम्मू कश्मीर नामांकन पत्रें दी जांच 6 अप्रैल गी होग।

<><><><><><>

### Army Commander

फौजी कमांडरें दा सम्मेलन अज्ज नमीं दिल्ली च शुरू होआ करदा ऐ ते एह ऑनलाइन ते ऑफ लाइन दौनें तरीकें कन्नै होग रक्षामंत्री राजनाथ सिंह होर बैठक गी संबोधत करगंन ते अगले म्हीने दी 2 तरीक गी वरिष्ठ फौजी अधिकारिएं कन्नै गल्लबात करगंन। अज्ज सेना प्रमुख जनरल मनोज पांडे कमान मुख्यालयें थमां इस सम्मेलन च हिस्सा लै करदे फौजी कमांडरें कन्नै वचुअल तरीके राएं गल्लबात करगंन। गल्लबात च फौज अगगे औने आली समस्याएं ते सैनिकें दे हितें सरबंधी मुद्दें पर मुख तौर पर चर्चा होग। पैहली अप्रैल गी शीर्ष फौजी अधिकारिएं दा बचार बमर्श आला सत्र होग। जेह्दे च भविक्ख दिएं चुनौतिएं दे हल दिएं तैआरिएं पर चर्चा होग। इस सत्र दे बाद सेना प्रमुख हुंदी अध्क्षता च गुप बीमें दी निवेश सलाहकार कमेटी दी बैठक होग। बैठक च बक्ख-बक्ख कल्याणकारी उपाएं ते माली सुरक्षा योजनाएं पर बचार-बंटादरा होग। सम्मेलन दे खीरलै ध्याड़े 2 अप्रैल गी चीफ ऑफ डिफेंस स्टाफ जनरल अनिल चौहान, नौसेना प्रमुख आर.हरि कुमार ते वायु सेना प्रमुख एयर चीफ मार्शल वी.आर.चौधरी सम्मेलन गी संबोधत करगंन। इस मौके पर रक्षा सचिव गिरिधर अरमाने ते रक्षा मंत्रालय दे होर वरिष्ठ अधिकारी मजूद रौंहगन।

<><><><><><>

### Army Chief

सेना अध्यक्ष जनरल मनोज पांडे होरें आक्खेआ ऐ जे मुख हर लेहाज कन्नै तैआर ऐ ते फौज दिएं कारवाइएं सरबंधी तैआरिएं बी बड़े आला दर्जे दियां न। इक निजी न्यूज चैनल आस्सेआ जंदी संजा आयोजित इक सैमीनार दरान बोलदे होई जनरल पांडे होरें जोर देइयै आक्खेआ जे भारत दी प्रतिक्रिया आली प्रणाली बड़ी मजबूत ऐ। चीन बारे बोलदे होई उनें आक्खेआ जे भारत समर्थ ते ढांचागत विकास बक्खी ध्यान देने दे कन्नो-कन्नी बन्ने पर होने आली घटनाएं पर बी नेड़मी तक्क रक्खा करदा ऐ। उनें इस गल्लै पर जोर पाया जे आत्म-निर्भर बनने दी रणनीति, भविक्ख लेई अत्त-लाजमी ऐ। जनरल पांडे होरें आक्खेआ जे रक्षा खेत्तर च अपनी विशेष समर्थ विकसित करने बक्खी चेचा ध्यान दित्ता जा'रदा ऐ।

<><><><><><>

## Delhi High Court

दिल्ली हाई कोर्ट नै दिल्ली दे मुख्मन्त्री अरविंद केजरीवाल होरें गी तुरत अरिम राहत देने गी इंकार करी दित्ता। हाई कोर्ट नै ईडी गी मुख्मन्त्री अरविंद केजरीवाल आस्सेआ ईडी आस्सेआ उंदी गिरफ्तारी ते कथित आबकारी घोटाले च पैहे दे गल्ल इस्तेमाल दे सरबंधें च 6 दिनें दी हिरासत ताई चुनौती देने आली याचिका लेई नोटिस जारी कीता ऐ। ओह इस मामले दे सरबंधे च ईडी दी हिरासत च न। न्यायधीश स्वराना कांता शर्मा हुंदी पीठ नै केजरीवाल हुंदी याचिका उप्पर ईडी गी अपना परता देने लेई 2 अप्रैल दा समा देने लेई नोटिस जारी कीता ऐ तां जे इस मामले दी सुनवाई 3 अप्रैल गी कीती जाई सकै।

<><><><><><>

## India

भारत नै अमरीका दे विदेश विभाग दे प्रवक्ता आस्सेआ दिल्ली दे मुख्मन्त्री हुंदी गिरफ्तारी उप्पर कीती दी टिप्पणी उप्पर तगड़ा बरोध दर्ज कीता ऐ। इक ब्यान च विदेश मामले मंत्रालय नै आकखेआ जे भारत देसै च होइ दी कनून प्रक्रिया उप्पर अपना तगड़ा बरोध दर्ज कराया ऐ। एहदे च आकखेआ जे विभाग दुएं दी कूटनीति च संप्रभुता ते अंदरूनी मामलें ताई इज्जत करनी लोड़चदी ऐ।

<><><><><><>

## Ukraine

यूक्रेन दे विदेश मंत्री दिमित्रो कुलेबा अज्ज नमीं दिल्ली पुज्जा करदे न। ओह विदेश मंत्री डॉ. एस.जयशंकर हुंदे साददे पर भारत दी दऊं दिनें दी सरकारी यात्रा पर आवै करदे न। इस दरान कुलेबा होर विदेश मंत्री ते उप-राष्ट्री सुरक्षा सलाहकार हुंदे कन्नै केई कार्यक्रमें च हिस्सा लैगन। विदेश मंत्रालय नै इक ब्यान च आकखेआ ऐ जे दौनें मंत्री आपसी हितें आले इलाकाई ते कुल संसारी सतह दे मुद्दें पर दपक्खी सांझेदारी ते सैहयोग दे मामलें पर चर्चा करगंन। अपनी भारत यात्रा थमां पैहले कुलेबा होरें आकखेआ जे यूक्रेन, भारत गी अंतर्राष्ट्री मुद्दें पर आवाज बुलंद करने आला इक महत्वपूर्ण भ्याल मननदा ऐ। मीडिया गी संबोधत करदे होई कुलेबा होरें प्रधानमंत्री नरेन्द्र मोदी ते यूक्रेन दे राष्ट्रपति ज़ेलेंसकी हुंदे

बशकार हाल च होई दी गल्लबात दा जिक्र कीता। उनें दस्सेआ जे दौनें नेताएं दपक्खी सैहयोग, बपार ते औंदे वैश्विक शांति शिखर सम्मेलन पर चर्चा कीती। उनें यूक्रेन दे पुननिर्माण च भारत दे सैहयोग दा सुआगत कीता। पिदले 7एं ब'रें च यूक्रेन दे कुसै विदेश मंत्री दी एह पैहली भारत यात्रा ऐ।

<><><><><><>

PM-Garba

प्रधानमंत्री नरेन्द्र मोदी होर विश्व च गरबा दी बधदी लोकप्रियता पर खुशी जाहर कीती। इक सोशल मीडिया पोस्ट च मोदी होरें आक्खेआ जे गरबा गी किश चिर पैहले UNECO दी सामुदायिक सांस्कृतिक विरासत सूचि च थाहर थोई ही ते किश दिन पैहले गै पैरिस च इस सरबंधै च मान्यता प्रमाण-प्रत्र हासल होआ। प्रधानमंत्री होरें आक्खेआ जे गरबा जीवन, संस्कृति ते समर्पण दा आयोजन ऐ ते एह लोकें गी इक दुए दे कोल लेई औंदा ऐ।

<><><><><><>

Anurag Ambassador

सूचना-प्रसारण, युवा मामलें ते खेड्ड मंत्री अनुराग सिंह ठाकुर होरें जंदी संजा विकसित भारत दे दूतें, उद्योगपतिएं ते स्टार्टअप्स चलाह करदे नोजवानें कन्नै मलाटी करियै उंदिएं समस्याएं बारे जानकारी हासल कीती। जम्मू दे कारोबारिएं, उद्योगपतिएं ते स्टार्ट-अप्स चलाह करदे नोजवानें मंत्री होरें गी गुजारश कीती जे सरकार गी स्टार्ट अप्स लेई होर जिमीं ते उद्योगें लेई खास पैकेज उपलब्ध करोआने लोड्चदे न। स्टार्ट-अप्स शुरू करने आले नोजवानें अनुराग ठाकुर होरें गी आग्रेह कीता जे उनेंगी मार्किटिंग ते सब्सिडी आले विशेष पैकेज दित्ते जान। उनें मंत्री होरें गी दस्सेआ जे जम्मू कश्मीर गी करठन इलाका होने दा नुक्सान भुगतना पौंदा ऐ ते सरकार गी नेड्मे भविक्ख च इत्थें ढांचागत विकास बक्खी खास ध्यान देना लोड्चदा ऐ। मंत्री हुंदे नै मलाटी करन आए दे फिल्म उद्योग दे लोकें ते खडारिएं आक्खेआ जे पिछले 4-5 ब'रें दरान प्रदेश च बूलीवुड ते कन्नै खेड्डे सरबंधी गतिविधिएं च बी बड़ा बाद्धा दर्ज कीता गेआ ऐ।

<><><><><><>

## Open Tennis

मेयामी ओपन टेनिस च शीर्ष विरेयता आले भारत दे रोनि बोपन्ना ते उंदे आस्ट्रेलिया दे जोडीदार मैथ्यू एडबन होर मर्दे दे डबल्स सैमीफाइनल च अज्ज चाथी विरेयता आले स्पेन दे खडारी मारकल ग्रैनोलरस ते अर्जेटीना दे होरासियो जैबलोस मर्दे दे डबल्स सैमीफाइनल च अज्ज मकाबला होग। मकाबला भारतीय समें मताबक रातीं साढे 10 बजे होग। भारतीय आस्ट्रेलिया जोडी नै क्वार्टर फाइनल च नीदरलैंड दे सेमवर्बीक ते आस्ट्रेलियाई जॉन पैट्रिक स्मिथ होरें गी 3-6, 7-5, 10-7 कन्नै हरया। जित्त कन्नै बोपन्ना हुंदी थाहर एटीपी शीर्ष 10 डबल्स रैंकिंग च जकीनी बनोग ते पेरिस ओलंपिक च सिधा क्वालीफाई बी होई जाग।

<><><><><><><><>

## IPL

आईपीएल च सनराइजर्स हैदराबाद नै मुंबई इंडियनस गी 31 रंजें कन्नै राजीव गांधी अंतर्राष्ट्रीय स्टेडियम हैदराबाद च कल रातीं हराई दित्ता। हैदराबाद नै 277 रंजें दा लक्ष्य रक्खेआ। हैदराबाद लेई क्लासन होरें 34एं गेंदे च 80 रंज बनाए, अभिषेक शर्मा होरें 23 गेंदें च 63 रंज बनाए। 2 सौ 78 रंजें दा पीछा करदे होई मुंबई इंडियनस नै 20एं ओवरें च 226 रंज बनाए। तिलक वर्मा नै 34 गेंदे च 64 रंज बनाए। अज्ज संजा राजस्थान रॉयल दा मकाबला दिलली कैपिटल्स कन्ने जयपुर दे स्वाई मान सिंह स्टेडियम च संजा साढे 7 बजे होग।

<><><><><><><><>